



P R A V I L N I K
o predizbornim i postizbornim finansijskim izvještajima i izvještajima o
prometu posebnog računa za finansiranje izborne kampanje
političkih stranaka

Sarajevo, maj 2024. godine

Na osnovu člana 15.2 stav (1) Izbornog zakona Bosne i Hercegovine („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), Centralna izborna komisija Bosne i Hercegovine je na 20. sjednici, održanoj 03.05.2024. godine, donijela

P R A V I L N I K
o predizbornim i postizbornim finansijskim izvještajima i izvještajima o
prometu posebnog računa za finansiranje izborne kampanje
političkih stranaka

POGLAVLJE I. UVODNE NAPOMENE

Član 1.
(Predmet)

Pravilnikom o predizbornim i postizbornim finansijskim izvještajima i izvještajima o prometu posebnog računa za finansiranje izborne kampanje političkih stranaka (u daljem tekstu: Pravilnik) uređuje se način podnošenja finansijskih izvještaja, sadržaj i forma finansijskih izvještaja i kontrola finansijskih izvještaja političkih stranaka koje učestvuju na izborima, a obavezne su izvještaje podnositi Centralnoj izbornoj komisiji Bosne i Hercegovine (u daljnjem tekstu: Centralna izborna komisija BiH).

Član 2.
(Obim primjene)

Odredbe ovog Pravilnika odnose se na sve političke stranke koje učestvuju na izborima za organe vlasti Bosne i Hercegovine.

POGLAVLJE II. NAČIN PODNOŠENJA FINANSIJSKIH IZVJEŠTAJA

Član 3.
(Finansijski izvještaj)

(1) Političke stranke koje učestvuju na izborima za organe vlasti u Bosni i Hercegovini na svim nivoima, dužne su Centralnoj izbornoj komisiji BiH podnijeti:

- a) finansijski izvještaj koji obuhvata period koji počinje tri mjeseca prije dana podnošenja prijave za ovjeru i završava danom podnošenja prijave za ovjeru (predizborni izvještaj);
- b) izvještaj o prometu posebnog računa za finansiranje izborne kampanje sa podacima o izvorima novčanih i nenovčanih donacija, troškovima izborne kampanje i računima dobavljača;
- c) dodatni finansijski izvještaj za period od dana podnošenja prijave za ovjeru do dana ovjere izbornih rezultata (postizborni izvještaj).

(2) Političke stranke finansijske izvještaje iz stava (1) ovog člana tačka a) i c), podnose Centralnoj izbornoj komisiji BiH u elektronskoj formi putem aplikacije FI CIK BIH (u daljnjem tekstu: aplikacija). Potvrdu o podnesenom finansijskom izvještaju i odštampane obrasce finansijskog izvještaja u PDF formatu, ovjerene potpisom ovlaštenog lica i pečatom političke stranke, političke stranke dostavljaju Centralnoj izbornoj komisiji BiH i u čvrstoj kopiji.

(3) Političke stranke finansijski izvještaj iz stava (1) ovog člana tačka b) podnose Centralnoj izbornoj komisiji BiH na sljedeći način: podatke o prometu posebnog računa, novčanim i nenovčanim donacijama i troškovima izborne kampanje putem aplikacije FI CIK BIH, a izvještaj o računima dobavljača i izvršilaca usluga na obrascima u excel formatu. Odštampane obrasce 1, 2, 3-a, 3-b, 3-e i 4.2. finansijskog izvještaja iz aplikacije FI CIK BIH u PDF formatu i izvještaj o računima dobavljača i izvršilaca usluga na obrascu 4.2D u excel formatu, ovjerene potpisom ovlaštenog lica i pečatom političke stranke, političke stranke dostavljaju Centralnoj izbornoj komisiji BiH putem e-maila.

(4) Centralna izborna komisija BiH može zatražiti od političkih stranaka podnošenje i dodatnih finansijskih izvještaja, dokumenata, objašnjenja i informacija, ako ih smatra neophodnim za potpuno i tačno obavljanje revizije.

Član 4. (Rokovi)

(1) Finansijski izvještaj iz člana 3. stav (1) tačka a) ovog Pravilnika, podnose sve političke stranke u vrijeme podnošenja prijave za ovjeru za učešće na izborima.

(2) Finansijski izvještaj iz člana 3. stav (1) tačka b), podnosi se tri dana prije dana održavanja izbora.

(3) Finansijski izvještaj iz člana 3. stav (1) tačka c) ovog Pravilnika, podnose sve političke stranke koje su učestvovala na izborima, u roku od 30 dana od dana kada Centralna izborna komisija BiH objavi konačne izborne rezultate.

Član 5. (Ovlašteno lice za podnošenje izvještaja)

(1) Politička stranka obavezna je da imenuje ovlašteno lice koje je odgovorno za podnošenje izvještaja i vođenje poslovnih knjiga.

(2) Politička stranka obavezna je prilikom podnošenja predizbornog finansijskog izvještaja Centralnoj izbornoj komisiji BiH dostaviti podatke o ovlaštenom licu zajedno s kontakt podacima.

(3) U slučaju promjene ovlaštenog lica iz stava (1) ovog člana, politička stranka dužna je najkasnije u roku od 15 dana od dana promjene ovlaštenog lica obavijestiti Centralnu izbornu komisiju BiH o promjeni.

POGLAVLJE III. SADRŽAJ I FORMA FINANSIJSKOG

IZVJEŠTAJA POLITIČKIH STRANAKA

Član 6. (Obrasci)

(1) Finansijske izvještaje iz člana 3. stav (1) tačke a) i c) ovog Pravilnika, političke stranke podnose na obrascima koji su sastavni dio Pravilnika o godišnjim finansijskim izvještajima političkih stranaka, a to su:

- | | |
|---|--------------|
| a) Opći podaci o političkoj stranci | Obrazac 1 |
| 1) teritorijalna struktura političke stranke | Obrazac 1.1. |
| b) Pregled prometa novčanih sredstava političke stranke | |
| 1) pregled prometa svih transakcijskih računa političke stranke | Obrazac 2 |
| 2) pregled prometa blagajne | Obrazac 2.1. |
| c) Izvori finansiranja političke stranke s pregledom izvora finansiranja po organizacionim dijelovima stranke | Obrazac 3 |
| 1) prilozi fizičkih lica | Obrazac 3-a |
| 2) prilozi pravnih lica | Obrazac 3-b |
| 3) prihodi od imovine u vlasništvu političke stranke | Obrazac 3-c |
| 4) dobit pravnih lica u vlasništvu političke stranke | Obrazac 3-d |
| 5) nenovčane donacije i računi koje politička stranka nije imala obavezu plaćati | Obrazac 3-e |
| 6) prihodi iz budžeta | Obrazac 3-f |
| 7) prihodi od izdavačke djelatnosti, prodaje propagandnog materijala i organizovanja stranačkih skupova | Obrazac 3-g |
| d) Rashodi političke stranke s pregledom rashoda po organizacionim dijelovima stranke | Obrazac 4 |
| 1) režijsko-administrativni i ostali troškovi | Obrazac 4.1. |
| 2) troškovi propagande | Obrazac 4.2. |
| e) Obaveze političke stranke | Obrazac 5 |

(2) Obrasci se moraju tačno i precizno popuniti.

(3) Tačnost i potpunost podataka u svakom obrascu svojim potpisom ovjerava ovlašteno lice koje je odgovorno za podnošenje izvještaja i vođenje poslovnih knjiga.

(4) Nakon što politička stranka unese podatke u obrasce o predizbornim i postizbornim finansijskim izvještajima u aplikaciju, dužna je da dostavi Centralnoj izbornoj komisiji BiH odštampan predizborni i postizborni finansijski izvještaj, kao i potvrdu o podnesenom izvještaju u kojoj su sadržani sljedeći podaci: naziv političke stranke, šifra stranke koju određuje Centralna izborna komisija BiH, vrsta izvještaja, izvještajni period, ime i prezime lica koje je unijelo podatke u finansijski izvještaj i datum podnošenja izvještaja.

Član 7.

(Izvjestaj o prometu posebnog računa)

(1) Finansijski izvještaj iz člana 3. stav (1) tačke b) ovog Pravilnika, političke stranke podnose sljedećim obrascima:

- | | |
|--|--------------|
| a) Opći podaci o političkoj stranci | Obrazac 1 |
| b) Pregled prometa posebnog računa za finansiranje izborne kampanje | Obrazac 2 |
| c) Prilozi fizičkih lica | Obrazac 3-a |
| d) Prilozi pravnih lica | Obrazac 3-b |
| e) Nenovčane donacije i računi koje politička stranka nije imala obavezu plaćati | Obrazac 3-e |
| f) Troškovi propagande | Obrazac 4.2. |
| g) Podaci o računima dobavljača | Obrazac 4.2D |

(2) Finansijske izvještaje iz stava (1) ovog člana, od tačke a) do f) političke stranke podnose na obrascima, koji su sastavni dio Pravilnika o godišnjim finansijskim izvještajima političkih stranaka.

(3) Podatke o računima dobavljača i izvršiocima usluga, koji su nastali u svrhu izborne kampanje, političke stranke podnose na Obrascu 4.2D, *Podaci o računima dobavljača*, koji je sastavni dio ovog Pravilnika.

(4) Obrasci se moraju tačno i precizno popuniti.

(5) Tačnost i potpunost podataka u svakom obrascu svojim potpisom ovjerava ovlašteno lice koje je odgovorno za podnošenje izvještaja i vođenje poslovnih knjiga.

(6) Nakon što politička stranka unese podatke u obrasce finansijskog izvještaja u aplikaciju, dužna je da dostavi Centralnoj izbornoj komisiji BiH odštampane obrasce 1, 2, 3-a, 3-b, 3-e i 4.2. izvještaja skupa sa obrascem 4.2D.

Član 8. (Dobavljači i izvršioci usluga)

(1) U Obrazac 4.2 D, *Podaci o računima dobavljača*, unose se sljedeći podaci:

- naziv političke stranke,
- vrsta troška,
- naziv dobavljača/izvršioca usluge i
- podatke o dokumentu (račun, ugovor ili dr): broj i datum računa i iznos računa.

(2) Centralna izborna komisija BiH može zatražiti da politička stranka dostavi kopiju dokumenata o troškovima propagande (računi, ugovori i dr).

Član 9.

(Popunjavanje obrazaca)

(1) Prilikom podnošenja finansijskih izvještaja iz člana 3. stav (1) tačke a) i c) ovog Pravilnika, politička stranka dužna je popuniti sve obrasce navedene u članu 6. ovog Pravilnika.

(2) Prilikom podnošenja finansijskih izvještaja iz člana 3. stav (1) tačka b) ovog Pravilnika, politička stranka dužna je popuniti sve obrasce navedene u članu 7. ovog Pravilnika.

POGLAVLJE IV. KONTROLA FINANSIJSKIH IZVJEŠTAJA I PODNOŠENJA DODATNIH IZVJEŠTAJA

Član 10. (Služba za reviziju)

(1) Služba za reviziju, prilikom pregleda finansijskog izvještaja političkih stranaka, utvrđuje:

- a) da li je izvještaj podnesen na propisanim obrascima iz ovog Pravilnika,
- b) da li su obrasci pravilno popunjeni,
- c) da li su obrasci potpuni (sveobuhvatni),
- d) da li izvještaj obuhvata sve poslovne promjene,
- e) da li su analitičke evidencije tačno sabrane,
- f) da li su podaci u izvještaju pravilno razvrstani po obrascima i
- g) da li je izvještaj dostavljen blagovremeno odnosno u propisanom roku.

(2) Pregled, kontrola i revizija finansijskog izvještaja obavlja se u skladu s Pravilnikom o administrativnim procedurama pregleda, kontrole i revizije finansijskih izvještaja političkih stranaka.

Član 11. (Dobrovoljno otklanjanje nepravilnosti)

Ako Centralna izborna komisija BiH smatra da politička stranka nije postupila u skladu sa odredbama Zakona o finansiranju političkih stranaka, odredbama Poglavlja 15. Izbornog zakona BiH i ovog Pravilnika, prije izricanja kazne ili preduzimanja administrativne mjere nastojat će postići da politička stranka, za koju je ustanovljeno da je prekršila odredbe navedenih zakona i ovog Pravilnika, dobrovoljno postupi i otkloni uočene nepravilnosti, ako su one otklonjive.

Član 12. (Sankcije i administrativne mjere)

Ako politička stranka ne postupi prema odredbama ovog Pravilnika, a utvrdi se da je politička stranka prekršila odredbe Poglavlja 15. Izbornog zakona BiH, te Služba za reviziju utvrdi da je prekršila odredbe navedenog zakona i ovog Pravilnika, predložiti će Centralnoj izbornoj komisiji BiH da političkoj stranci izrekne sankciju ili preduzme odgovarajuću administrativnu mjeru.

POGLAVLJE V. NAČIN PRISTUPA JAVNOSTI INFORMACIJAMA SADRŽANIM U FINANSIJSKIM IZVJEŠTAJIMA

Član 13. (Troškovi kampanje)

(1) Centralna izborna komisija BiH na svojoj internet-stranici objavljuje podatke o maksimalno dozvoljenom iznosu troškova kampanje u skladu sa Izbornim zakonom BiH i podatke o troškovima kampanje koji su iskazani u postizbornim finansijskim izvještajima političkih stranaka.

(2) Izvještaj o prometu posebnog računa za finansiranje izborne kampanje, sa podacima o izvorima novčanih i nenovčanih donacija, podacima o svim troškovima (rashodima) izborne kampanje, kao i računima dobavljača i izvršilaca usluga objavljuje se na internet-stranici Centralne izborne komisije BiH tri dana nakon dana održavanja izbora.

(3) Postizborni finansijski izvještaji svih političkih stranaka koje su učestvovala na izborima, a koji su podneseni Centralnoj izornoj komisiji BiH, objavljuju se na internet-stranici Centralne izborne komisije BiH u roku od 30 (slovima: trideset) dana od isteka propisanog roka za podnošenje izvještaja.

Član 14. (Prestanak primjene)

Danom stupanja na snagu ovog Pravilnika, prestaje da važi Pravilnik o predizbornim i postizbornim finansijskim izvještajima političkih stranaka („Službeni glasnik BiH“, broj 10/18 i 5/22).

Član 15. (Stupanje na snagu i objavljivanje)

Ovaj Pravilnik stupa na snagu danom donošenja, a objavit će se u „Službenom glasniku BiH“, „Službenim novinama Federacije BiH“, „Službenom glasniku RS“, „Službenom glasniku Brčko distrikta BiH“ i na internet-stranici Centralne izborne komisije BiH.

Broj: 05-1-02-2-581-1/24
Sarajevo, 03.05.2024. godine





Stranica ___ od ___

Obrazac 4.2D

PODACI O RAČUNIMA DOBAVLJAČA

Naziv političke stranke: _____

Red. br.	Vrsta troška	Naziv dobavljača/izvršioca usluga	Podaci o dokumentu (račun, ugovor ili dr.)	
			Broj i datum	Iznos
1	2	3	4	5
UKUPNO:				

 (Mjesto i datum)

 (Potpis ovlaštenog lica)